

**Date – 01/01/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Buaina lian tham leh mipui nunphung tibuai tham awm lovin kum thar chu hlim leh muanawm taka hmuah thlen a ni.
2. Nizan khan sorkar leh central YMA-in hal lo tura an ngen chungin Aizawl khawpui-ah halpuah leh halmawi an hal nasa hle.
3. Pi K. Vanlalngaii (78) Lunglei chu nizan dar 9 vel khan a chenna-inah thi a hmuh a ni a, tualthi ni ngei a hriat a ni.
4. Thla leh Feb. ni 1 atangin vaihlo atanga thil siamchhuah chi hrang hrang atangin chhiah lak belh a ni dawn.

<><><>

**NEW YEAR**

Kum hlui thlahna leh kum thar hmuahna nizan lamah Mizoram pumah buaina lian tham leh mipui nunphung tibuai tham awm lovin kum thar chu hlim leh muanawm taka hmuah thlen a ni.

Nizanah khan kohhran hrang hrangah kum hlui thlahna leh kum thar inkhawm a awm a. Kum tawp inkhawm, kum hlui a kohhran inkhawm hnuhung ber hi lawmthu sawi leh soal thupha chawi inkhawm, kohhran report ngaihthlakna hun tur leh kum kal mek chhunga kohhran member thite sunna hun atana hman a ni a. Nizanah hian kumin chhunga chatuan ram pante an chhungkhat laina leh thiante inkhawm an thahnem hle a ni. Kohhran tam takin zanlai inkhawm an buatsaih baw a. Biak-ina Pathian biak inkhawm an ban hnu hian kohhran tam tak chu an lengkhawm zui baw a ni. Catholic kohhran chuan nizan kha chawimawina hunah an hmang a, kohhran dangte ang bawkin nikum chhunga kohhran member chatuan ram pan Tate puala hun hmangin tawngtaisakna hun an buatsaih a ni.

Vawiin kum thar ni hi khua/veng hrang hranga kohhran hrang hrangte chu Pathianni anga hmangin kum thar pualin tualchhung kohhran biak-inah theuh an inkhawm a. Pathianin kum thar a hruai thlen lawmna lam hawi thu sawi leh zaiho a nih bakah kohhran thenkhat chuan tlai lamah ruai an theh a. Kohhran tam ber erawh chuan naktuk lamah ruai an theh thung dawn a. Ruai theh ve lo kohhrante chuan vawiin hian thingpui ruai an buatsaih a ni. Catholic kohhran chuan vawiinah hian Pathian Nu Mari puala hun hmangin ‘Mass thianghlim’ an buatsaih baw. He ti hian kum thar lawmna chu kohhran tam berah a tiak nghal dawn a ni.



## HOSPITAL, POLICE REPORT

Nizan kum hlui thlahna leh kum thar lawmna-ah Aizawl-ah harsatna leh buaina lian tham report a awm lo chungin lirthei chesual leh zurui buaina siam an awm nual.

Nizan kum hlui thlah zan atanga vawiin kumthar ni thlenga Akashvani news Aizawl in Aizawl khawpui chhunga damdawiin hrang hrangte atanga report a dawn danin Civil Hospital casualty pantu mi 91 an awm a, heng zingah hian lirthei chesual avanga casualty pan hi mi 15 an awm bakah zu ruih avanga pumna leh intipalh an awm nual bawk. Ebenezer Hospital casualty pawhin pantu an nei nual a, heng zingah hian case pangate chu tlem a serious deuh niin lirthei chesual leh zu kaihhnawih an ni hlawm. Synod Hospital pawhin casualty pantu mi 23 an awm a, heng zingah hian mi 9-te chu admit an ni a, casualty pantu zingah pumna leh pum lam sawisel an tam ber a ni.

Mizorama Police Station hrang hrang atanga report dawn chinah Ni zan khan zu ruia insualbuai vanga man 14 awmin, zu ruih kaihhnawiha man 5 dang an awm bawk a. Aizawl Police Station-ah rukruk thubuai avangin tang mi pahnih, hmeichhia leh mipa an awm a. Bawngkawn Police Station-ah zurui chunga lirthei khallh avanga midang lirthei su chhia mipa pakhat tang awmin, Kulikawn Police Station-ah zu rui khawlai a buaina siam mipa pakhat tang a awm bawk. Zonuam Outpost pawhin rukruk thil a man mipa pakhat leh zu ruih avanga buaina siam, mipa pakhat an kawl bawk. Heng bakah hian Lawngtlai Police Station chuan rukruk thubuai a rinhlelh mipa pakhat hren mek an nei a ni.



## FIREWORKS

Kum hlui 2025 thlah a kum thar 2026 lawmna nizan khan sorkar leh central YMA-in hal lo tura an ngen chungin Aizawl khawpui-ah halpuah leh halmawi an hal nasa hle.

Nizanah khan thim hlim atangin halpuah ri a awm tan tawh a, an hal nasat hun chu zan dar 11 leh a chanve vel atangin a intan a, zanlai dar 12 pelh darkar chanve vel thleng a ni a. Halpuah leh halmawi bakah meithallawn pawh an kap chhuak nasa hle. Aizawl khawpui-ah hian halpuah ri vanga thawhah zual pitar pakhat chu LRM hospital-a kalpui a nih hnu-ah Civil Hospital Aizawl ICU ah dah luh a ni a. Halpuah hal vanga hliam nei hospital panpui an awm lo. District hmunpui dangah pawh halpuah leh halmawi hi an hal a, khawpui thenkhatah an hal nasat viau lai-in thenkhatah chuan an hal nasa lem lova, puak pheuh pheuh tih ang chauh pawh a awm hlawm. Kolasib khawpui leh a chhehvelah chuan zanlai dar 12 a rik veleh halpuah lam chi hal a tam hle a, Champhai-ah chuan kumhlui thlahna leh kumthar lawm na'n halpuah leh halmawi te hal a ni na a kum kalta aiin an hal nasa lo. Serchhipah pawh kum thar hlima hal engemaw zat an awm a, a puak ring chi erawh a tam vak lo.

Police report-a a lan dan chuan Lunglei khawpui-ah zanlai bawr velah a puak nasa thawkhat a, a awh rei lo thung a, Siaha-ah minute hnih khat chhung vel a puak ve pheuh pheuh chauh. Lawngtlai-ah pawh rei vak lo chhung chu a puak nual a, nikum lam aiin a ziaawm. Mamit-ah chuan zanlai dar 12:00 rik dawnah puak pahnih

khat a awm a, chu bak puak thawm hriat a awm lova, Khawzawlah a puak ve pheuh pheuh a, a awh rei lo. Hnahthialah pawh rei lote chung a puak ve pheuh pheuh a, Saitual pawh chutiang deuh tho chu a ni.

<><><>

#### NEW YEAR BABIES

Hriat theih chinah kum thara Aizawl a nausen piang hmasa ber chu tukin dar 12 minute 5 khan Civil Hospital, Aizawl-ah a piang.

Civil Hospital, Aizawl atanga thu dawn danin Zodinsangi leh Vanlalhlana, Aizawl Khatla veng te fanu kg 3 a rit hi damdawi-inah hian tukin zing dar 12 leh minute nga khan a piang a. Hriat theih chinah Aizawl a nau piang hmasa ber a ni. He naute bakah hian Ngopa khawmi Pi Cindy Lalmalsawmi chuan BN Hospital, Kulikawn-ah zing lan dar 12 leh minute 12 khan nau a nei bawk a. Pi Cindy Lalmalsawmi fa hrin hi mipa a ni ve thung a, kg. 3 leh gram 240 a rit a ni.

Kum hlui, 2025 a India rama nau piang hmasa ber leh Generation Beta an tih mai hun intanna a khaw eng rawn hmu hmasa ber chu Frankie Lalremruatdika Zadeng a ni a, Durtlang a Synod Hospital-ah January ni 1, 2025 zing dar 12 leh minute 3 khan a piang a. A nu leh pa hi Aizawl Khatla East veng ami Pi Ramzirmawii leh Pu ZD Remruatsanga te an ni a. He nausen hi a pian hlimin kg 3 leh gram 12 a rit a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### ARECA NUT SEIZURE

Kolasib Police te chuan an thudawn bawhzui in, nimin khan Kolasib bul Thingdawl Chhimveng huam chungah Burma atanga lokal kuhva ro phurtu truck leh a khalhtu an man.

He mi chungchangah hian Kolasib Police Station-ah thubuai ziah luh a ni a. Burma kuhva ro phurtu Truck hi Jobrul Islam (kum 23), Karimganj District, Assam a cheng nia inchhal khalh a ni a. Kuhva ro hi buara ip 167 a dah niin, kg 13,360 a rit ni a hriat a ni a, tualchung rate ah chuan cheng nuai 33 leh sing 4 hu ni a chhut a ni. Truck khalhtu Jobrul Islam-a'n a sawi dan in, heng kuhva rote hi Zemabawk leh Tuirial inkara hmun li atangan a truck khalh a hlan a ni a, kuhva neitu hian Lailapur, Assam-ah dah turin a phurhtir a, phurh manah Rs. 80,000/- a pe niin a sawi bawk.

Kuhva phurh na'na hman truck leh a khalhtu hi Kolasib Police Station-ah nizan khan kawl in, vawiin ni hian Kolasib District Court-ah hruai a ni.

<><><>

## HOMICIDE

Pi K. Vanlalngaii (78) Lunglei chu nizan dar 9 vel khan a chenna-inah thi a hmuh a ni a, tualthi ni ngei a hriat a ni.

Lunglei district SP Pu J. Lalmuankima'n Akashvani Aizawl news a hrilh danin Pi K. Vanlalngaii hi Lunglei Kikawn Bazar Venga amaha khawsa a ni a. A fate'n a ruang an hmuh hnu-ah Police-in tihur tulte ti-in forensic science lam mithiamte pawhin a ruang leh a behbawm an endik a. Mi kuttuar a thi ni ngei a rin a ni a, Police sawi danin a nghawngah hliam a awm a, a tukhum veilamah hliam a awm bawk a. A thih chhan hi a lu-a vuak emaw a lu a tauhna emaw ni a hriat a ni. Amah chauhva awm harsa tak a nih avangin a chenna in pawh hi Anganwadi building hnuai a ni a, local council-in man chawi lova an luahtir a ni a. A ruang hi a fapa-in a chenna in Luangmual-ah la-in post mortem examination tih zawh hnuah vawiin chawhnu lam khan vui liam a ni.

Police sawi dan chuan Pi K. Vanlalngaii hi mi thilphalte hunpui pualin tanpuina an pe khawm nual a, cheng sing hnih chuang chu a kawl a rin a ni a. Hei hi laksak tumin an rawk a nih rinhlelhna a lian hle a. Police-in ngawrh takin an chhui zui mek a, Lunglei Police Station-ah vawiin khan Bharatiya Nyaya Sanhita (BNS) section 103(1) (tualthat hremna) hmanga thubuai ziahluh a ni a. he chanchinthar ziah lai hian Police-in rinhlelh man an la nei lo. Amah hi zalenna sual a Mizo National Army (MNA) zawm a a pasal (thi tawh) nena rammu ve tawh a nih thu dawn a ni.

<><><>

## CHAKMA STUDENTS STIR

Central Mizoram Chakma Students' Union (CMCSU) chuan nimin khan Chakma autonomous district council (CADC) huam chhungah tun hnai a chi inthliarna kaihnawihna tualthi Anjel Chakma tana dikna phutin nawrh an huaihawt.

Dehradun a MBA zirlai Anjel Chakma thihna hian ram pum a nghawng a thinrimna a chawh chhuak nasa hle a. CMCSU chuan Uttarakhand Police-in a thubuai an kalpui dan chu na taka sawiselin Anjel Chakma tualthih chungchang hi Central Bureau of Investigation (CBI) chhui an ngiat a. Nunna chan ta leh a chhungkhat lainate'n dikna an hmuh ngei an phut a. A thubuai pawh hi Delhi a sawn an dil bawk a. Uttarakhand Police-te chu a tira FIR thehluh a nihin thubuai ziah lut lawk duh lovah an puh bawk a ni. He thil thleng rapthlak tak hian ram chung hmun danga hmarchhak mi awmte dinhmun derthawnzia a tilang a ni, an ti. CMCSU chuan hmarchhak a awm hnam hrang hrangte chu en hran bik a nihna a tangrual turin an sawm bawk a ni.

<><><>

## ADDL EXCISE DUTY ON TOBACCO PRODUCTS

Thla leh Feb. ni 1 atangin vaihlo atanga thil siamchhuah chi hrang hrangah chhiah lak belh a ni dawn a, pan masala atangin chhiah thar lak a ni dawn bawk.

Sorkar laipui thuchhuahin a tarlan danin, Fpan masala, cigarette, vaihlo leh hetiang lam chi atangin Goods & Services Tax (GST) zaa 40 lak a ni ang a, biri-ah GST zaa 18 lak a ni bawk ang. Heng bakah hian pan masala atangin Health & National Security Cess lak a ni dawn a ni.

Pan masala leh vaihlo lam thil atanga excise duty lakna tur, Health & National Security Cess thar hi Parliament-in December thla khan a pass a ni.

<><><>